

De Vetr Kaschper war Richter

De Vetr Kaschper vun der Nei Gass in unserem Dorf is a aarich akkurate Mann gwen, er war schun phaarmol in Temeschwar, un sogar eenmol mitm Nachtzug is,r uf Wien gfahr. Er hat sich gut in der Welt ausgekennt er hat sogar eenmol, ich menn des war an eem Samschtaa, mit,m Stuhlrichter vum Bezirk an eem Tisch ghuckt. De Stuhlrichter war freilich an eem End un de Vetr Kaschper am annere End vun dem Tisch. Un weil er sich so gut in allem ausgekennt hat, han die Dorfleit ne zum Richter gwählt. Un wie de Vetr Kaschper in sei Amt ingsetzt ginn is, war sogar der Stuhlrichter korz an unserem Dorf langscht gfahr kumm. Noh Johre hat es sich dann zugetraa, dass der Stuhlrichter vum Bezirk a groöi Feierlichkeit abghal hat. Bei dere Gelejeheit is aach der Vetr Kaschper mit so em Zettl inglaad ginn. Wie er dann an dem feschtgesetzte Taa in seiner Sunntaagsmuntur, die was er extra vor den Taa angezoo hat, vor dem Gebeide gstann hat, wu die Feierlichkeit abghall ginn is, han sei Knie doch a bissl gwacklt vor Ufregung. Wie er an dere Glock gezoo hat, was an dem Portal war, wollt der Porteer ne net ninlosse, weil er mit dere Schnelllichkeit vrgesst hat, for den Zettl in sei inwenziche Sack tun. „Do rin willt ihr“, saat der Porteer, „ja, wer seit dann ihr, dass ihr do rinnkumme mecht?“ „Ich sinn der Richter vun Kleenwalddorf, saat der Vetr Kaschper un putzt sei Schnauzer vun dem Thuwak ab, der wu ihm dort dran phicke geblieb war, wie er sei Pheif es letschti Mol an der Bahn gstoppt hat.“ „Ja“, saat der Porteer nomol, „des reicht mer net, ohni Zettl geht des net. Mir han aach unser Vorschrifte: mir derfe net alli rinlosse, die was vun der Bahn angloff kumme un sich net ausweise kenne.“ Do saat de Vetr Kaschper: „Ich han schun vor eener Wuch so a Einladung griet, han se awer han se awer in der Schnelllichkeit derhem ufm Weinfass vergesst. Ich saan eng nomol, dass ich de Richter vun Kleenwaddorf sinn, des muss doch reiche, dass ich do rinkann.“ „Ja awer warum seit ihr Richter ginn“, mennt do der Porteer wieder? „Na, weil ich“, stottert de Vetr Kaschper un weeb nimmi, was er saan soll. Do is m ingfall: „Weil ich unser Gemeinde Biko kaaft han, un Schmier mache kann vor die Kretz haale, was die Schwein un Schof im Summer immer krien. Un wie die zwei so rum Gebaliascht han, kummt de Stuhlrichter un fihrt de Vetr Kaschper in des Zimmer, wu schun die anneri Owrichkeite vun die Derfer gsitzt han un sich vun dem Wein, was dorte war, net zweimol heeße glosst han. Scheen is dorte zugang, mit der Zeit is der Wein deni Leit aach a bissl in de Kopp gstie. Un bei dem Dischkorsch, was dorte gfiert ginn is, hat der Vetr Kaschper die Bezirksowrichkeit in unser Dorf inglaad, dass se mol schau tun, wie der Zufahrtwech ins Dorf ausschaut. Er hat sie bei dere Gelejeheit gebitt, dass aach unser Dorf a Schotterstroß krien tut, weil im Winter hat mer net raus un net nin in,s Dorf kenne. De Stuhlrichter un die anneri Hotwolees han versproch, dass se mol unnerem Jahr schau kumme, was mer do mache kennt. Wann die Zeit kummt, werese es de Vetr Kaschper schun wisse losse. Es hat wirklich gar net so lang gedauert, do is unser Dorfleit mit em Schreiwes vum Bezirk zugetraa ginn, dass in selem Jahr. Mitte im Monat August, die Bezirksprominenz kumme wärd. Newebei war noch gschrieb, dass

die Dorfsleit sich khe große Auslage mache selle, weil mit eener kleeni Erfrischung bei dere Hitzt sinn se zufriede. War des a Ufregung in unserem Dorf! Heiß war,s domols de Staab war net zu benniche, weil greent hat,s schun lang nimehr. Awer de Vetr Kaschper wär jo net Richter ginn, wann er net aach in so em Fall a Auswech gfunn hätt. Bevor der Taa kumm war, wu die Herre vum Bezirk in unser Dorf kumme sollte, hat de Vetr Kaschper die Dorfsleit schun zu wisse getun un alles bis ins Klenschi organisiert. Sogar die Feierwehr mit ihre neiji Spritz ware ingsaat, sie selle den Wech a bissl abspritze, vun dorte, wu die Owrichkeit vum Bezirk aus ihrem Auto aussteije bis ins Gmeindehaus. So hat er des Schreiwes verstant, was er vun ihne kriet hat, wu se nor a kleeni Erfrischung verlangt han. Des war a Hitzt an selem Taa, un vor der Sunn war khe enzichi Wolke, so dass mer a Hoffnung uf a bisl Schatte ghat hätt. Nix wie heiß un Staab war in die Gasse, un aach khe Luftzuch weit un braat. Die Schulkinner un die Musikante ware am unwillichschte. Die Kinner han dort unbeweglich stehn solle, nor die Musikante un die Feierwehrsleit sinn immer wieder zum Vetr Johann ins Wertshaus geloff un han sich bei dere Hitzt de Dorscht mit em Spritzer Wein gelescht. Do ruft uf enmol de kleen Phetr vum Kercheturm, dass er a große Staabwolke in dr Ghilader Strooß gsieht. Sofort han sich die Musikante un die anneri Dorfslei alli in die Reih ufgstellt un abwart, die Feierwehrleit han de notwendsiche Druck in die Spritz gepumpt. Dann war des Auto mit deni Herre schun in dere Hauptgass um de Ecke kumm, die Musich hat de Alte-Kummrademarsch gspielt un de Lehre hat schun angstimmt vor des Lied zu singe, wu alli hoch lewe selle. Des Auto is stehn geblieb un de Stuhlrichter, der was a bissl kleen awer dick war, is mit deni anneri Beitasche raus ausm Auto, un in dem Spalier, wu die Leit gmacht han, dedorch gang, vor de Dorfrichter un sei Gschworeni begrieße. Des war a Krawall, die Leit han gschrie, die Kinner han gsung un die Musich hat gspielt, so dass mer sei eigenes Wort net verstant hat. Dann hat de Vetr Kaschper sei krumme Stecker, den was er immer bei sich ghat hat, in die Heh ghob, dass endlich mol a Ruh is un er sei Anred halle kann. Des muss awer der Feierwehrkummandant falsch verstant han. Der hat sofort den Befehl ginn vor die Erd uf spritze. Awer der Mann, was vore an dm Schlauch war, hat vun deni vielen Spritzer Wein, n was er vorher getrunk hat, nimmi richtig gsiehn, hat dann die Spritz ufgedreht un so den Stuhlrichter un die anneri Herre vum Bezirk mit zehn oder elf Atü angespritzt, dass se den Moment uf dr Erd glee un mit Händ un Fieß gezawlt han. Wie dann der Druck aus dere Spritz raus war un die ganzi versammelti Leit verschrock zugschaut han, is der Stuhlrichter zamm denni anneri Herre vum Bezirk ins Auto gelaaf, un sie sinn dann so schnell fortgfahr, wie sie kumm ware. Bis de Vetr Kaschper rede hätt kenne, ware die meischi Dorfsleit schun hemgang. Un so hat Klenwalddorf noch langi Johre khe Schotterstroß griet ghat, un die Leit han weiter im Herbst un Winter bei schlechtem Wetter vier Ross vor de leere Waa inspanne misse.